



老樣樹

老樣樹一兩百歲咧，恬恬企在伙房背个大圳脣，當初時係仰脣个因緣，會在這落腳生根？
 跔緊祖公輩一個個過身，厥个身世乜石沉海肚無哪尋咧，單淨知講一代代人在厥目頭下出世、
 大漢，出外鄉做頭路到老死轉屋。佢，像故鄉親人个樣，在遊子心肝肚縳核一條幼線，該遊
 遊野野个鄉情，也像吊在樹頂个黃樣，時時晃啊晃，晃都人安生毋得。

細人，年年大；樣樹，歲歲高，寒來暑往，無掌聲，無詩人个讚嘆，佢恬恬開花、打子，
 鳥來做寶，佢用砸礮个樹榪庇蔭，風來搞寮，佢用輕輕个掌聲回答，熱情个日頭好尋佢搞園
 人尋，地泥下一跡一跡个日頭花，斯係厥等徒步个腳跡。蔭涼个樹下，有清淨个圳溝，婦人
 家安心在這湯湯洗洗，開陽个石礪面，老人家悠閒坐寮。體恤歇睏个做事人，佢用大皮大皮
 个青葉招來清風，不管時行過厥腳下个人，做下會頓腳伸腰，享受該老樣樹送來个清涼。

細人也同佢相親，樹下个齣事仰脣都毋會煞，水細時節，覓蜆拈嚙螺，轉幹个堆沙，斯
 打板做皇宮。水底石頭縫，三不二時會拈著做齋買水个銀角，在該匱都厝痢肚个年代，金哲
 哲个兩角銀係盡好个犒賞，好食个零嗒、枝冰斯對這來。圳溝水貢貢滾該下，一陣細人會跔
 水拋大浪，對樣樹下个石板橋，直直拋到下一板橋去，走往上，過再來一到。恁泥來來回回，
 上上下下，在老樣樹个眼底下，這兜無人管酌个細姪，逐個都搞去歡喜轟天，高高个老樣樹
 乜看都緊拍手，黃啍黃啍个青樣，跔風晃啊晃，晃到歡喜咧，斯擲繡球樣賞分樹下个細人陣。
 好天，樹下恁多人，落雨天，佢也毋會孤栖，雨落越大，佢斯越慷慨，圍身个樣一粒一粒擲
 無停，樹下拈樣个笑聲也跔緊一聲一聲傳無停。

歲歲年年，老樣樹還係葉青遮日。嬰兒出世个雞酒香，還係分佢頭暈暈；年年送走个老
 朋友，還係分佢毋盼得。毋過，這兜並無影響佢盡心盡力時到開花、花謝打子，順應自然个
 心情。萬物之靈个偲人係毋係該當學習厥精神呢？

作者：劉玉蕉

☆詞彙學習☆

- | | |
|---|--|
| 【目頭下】mug ^ˊ teu ^ˇ ha ⁺ ：眼底。 | 【匱都厝痢肚】kuai ^ˇ do ⁺ o ⁺ li ^ˋ du ^ˊ ：比喻窮得要命。 |
| 【安生毋得】on ⁺ sen ⁺ m ^ˇ ded ^ˊ ：形容內心無法平靜。 | 【貢貢滾】gung ^ˋ gung ^ˋ gun ^ˊ ：形容水勢盛大。 |
| 【石礪】shag ^ˋ bog ^ˊ ：以石頭砌成的駁坎。 | 【拋大浪】pau ⁺ tai ^ˋ long ^ˋ ：一種刺激的親水遊戲，與現代滑水道雷同。 |
| 【不管時】bud ^ˊ guan ^ˊ shi ^ˇ ：不論何時。 | 【管酌】guan ^ˊ zhog ^ˊ ：看管、約束。 |
| 【齣事】chud ^ˊ sii ^ˋ ：花樣。 | 【黃啍】vong ^ˇ ho ⁺ ：微黃。 |
| 【嚙螺】bid ^ˋ lo ^ˋ ：黏附在水邊駁坎壁的小螺。 | |

☆文法學習☆

- 【跔緊】ten^ˇ gin^ˊ：跟著。「V 動詞+緊」表示動作正在進行、持續。例如：捉緊(zog^ˊ gin^ˊ，抓著)、帶緊(dai^ˋ gin^ˊ，帶著)、扳緊(ban⁺ gin^ˊ，扶著)……等。